

AD EPHESIOS

Capitulum: **1** 2 3 4 5 6

CAPITULUM 1

Paulus apostolus Christi Iesu per voluntatem Dei sanctis omnibus qui sunt Ephesi et fidelibus in Christo Iesu

² gratia vobis et pax a Deo Patre nostro et Domino Iesu Christo

³ benedictus Deus et Pater Domini nostri Iesu Christi qui benedixit nos in omni benedictione spiritali in caelestibus in Christo

⁴ sicut elegit nos in ipso ante mundi constitutionem ut essemus sancti et immaculati in conspectu eius in caritate

⁵ qui praedestinavit nos in adoptionem filiorum per Iesum Christum in ipsum secundum propositum voluntatis suae

⁶ in laudem gloriae gratiae suae in qua gratificavit nos in dilecto

⁷ in quo habemus redemptionem per sanguinem eius remissionem peccatorum secundum divitias gratiae eius

⁸ quae superabundavit in nobis in omni sapientia et prudentia

⁹ ut notum faceret nobis sacramentum voluntatis suae secundum bonum placitum eius quod proposuit in eo

¹⁰ in dispensationem plenitudinis temporum instaurare omnia in Christo quae in caelis et quae in terra sunt in ipso

¹¹ in quo etiam sorte vocati sumus praedestinati secundum propositum eius qui omnia operatur secundum consilium voluntatis suae

¹² ut simus in laudem gloriae eius qui ante speravimus in Christo

¹³ in quo et vos cum audissetis verbum veritatis evangelium salutis vestrae in quo et credentes signati estis Spiritu promissionis Sancto

¹⁴ qui est pignus hereditatis nostrae in redemptionem acquisitionis in laudem gloriae ipsius

¹⁵ propterea et ego audiens fidem vestram quae est in Domino Iesu et dilectionem in omnes sanctos

¹⁶ non cesso gratias agens pro vobis memoriam vestri faciens in orationibus meis

¹⁷ ut Deus Domini nostri Iesu Christi Pater gloriae det vobis spiritum sapientiae et revelationis in agnitione eius

¹⁸ inluminatos oculos cordis vestri ut sciatis quae sit spes vocationis eius quae divitiae gloriae hereditatis eius in sanctis

¹⁹ et quae sit supereminens magnitudo virtutis eius in nos qui credidimus secundum operationem potentiae virtutis eius

- ²⁰ quam operatus est in Christo suscitans illum a mortuis et constituens ad dexteram suam in caelestibus
- ²¹ supra omnem principatum et potestatem et virtutem et dominationem et omne nomen quod nominatur non solum in hoc saeculo sed et in futuro
- ²² et omnia subiecit sub pedibus eius et ipsum dedit caput supra omnia ecclesiae
- ²³ quae est corpus ipsius plenitudo eius qui omnia in omnibus adimpletur

CAPITULUM 2

Et vos cum essetis mortui delictis et peccatis vestris

- ² in quibus aliquando ambulastis secundum saeculum mundi huius secundum principem potestatis aeris huius spiritus qui nunc operatur in filios diffidentiae
- ³ in quibus et nos omnes aliquando conversati sumus in desideriis carnis nostrae facientes voluntates carnis et cogitationum et eramus natura filii irae sicut et ceteri
- ⁴ Deus autem qui dives est in misericordia propter nimiam caritatem suam qua dilexit nos
- ⁵ et cum essemus mortui peccatis convivificavit nos Christo gratia estis salvati
- ⁶ et conresuscitavit et consedere fecit in caelestibus in Christo Iesu
- ⁷ ut ostenderet in saeculis supervenientibus abundantes divitias gratiae suae in bonitate super nos in Christo Iesu
- ⁸ gratia enim estis salvati per fidem et hoc non ex vobis Dei enim donum est
- ⁹ non ex operibus ut ne quis glorietur
- ¹⁰ ipsius enim sumus factura creati in Christo Iesu in operibus bonis quae praeparavit Deus ut in illis ambulemus
- ¹¹ propter quod memores estote quod aliquando vos gentes in carne qui dicimini praeputium ab ea quae dicitur circumcisio in carne manufacta
- ¹² quia eratis illo in tempore sine Christo alienati a conversatione Israhel et hospites testamentorum promissionis spem non habentes et sine Deo in mundo
- ¹³ nunc autem in Christo Iesu vos qui aliquando eratis longe facti estis prope in sanguine Christi
- ¹⁴ ipse est enim pax nostra qui fecit utraque unum et medium parietem maceriae solvens inimicitiam in carne sua
- ¹⁵ legem mandatorum decretis evacuans ut duos condat in semet ipsum in unum novum hominem faciens pacem
- ¹⁶ et reconciliet ambos in uno corpore Deo per crucem interficiens inimicitiam in semet ipso
- ¹⁷ et veniens evangelizavit pacem vobis qui longe fuistis et pacem his qui prope
- ¹⁸ quoniam per ipsum habemus accessum ambo in uno Spiritu ad Patrem
- ¹⁹ ergo iam non estis hospites et advenae sed estis cives sanctorum et domestici Dei
- ²⁰ supraedificati super fundamentum apostolorum et prophetarum ipso summo angulari lapide Christo Iesu
- ²¹ in quo omnis aedificatio constructa crescit in templum sanctum in Domino
- ²² in quo et vos coaedificamini in habitaculum Dei in Spiritu

CAPITULUM 3

huius rei gratia ego Paulus vinctus Christi Iesu pro vobis gentibus
² si tamen audistis dispensationem gratiae Dei quae data est mihi in vobis
³ quoniam secundum revelationem notum mihi factum est sacramentum sicut supra scripsi in brevi
⁴ prout potestis legentes intellegere prudentiam meam in mysterio Christi
⁵ quod aliis generationibus non est agnitus filiis hominum sicuti nunc revelatum est sanctis apostolis eius et prophetis in Spiritu
⁶ esse gentes coheredes et concorporales et conparticipes promissionis in Christo Iesu per evangelium
⁷ cuius factus sum minister secundum donum gratiae Dei quae data est mihi secundum operationem virtutis eius
⁸ mihi omnium sanctorum minimo data est gratia haec in gentibus evangelizare ininvestigabiles divitias Christi
⁹ et inluminare omnes quae sit dispensatio sacramenti absconditi a saeculis in Deo qui omnia creavit
¹⁰ ut innotescat principibus et potestatibus in caelestibus per ecclesiam multiformis sapientia Dei
¹¹ secundum praefinitionem saeculorum quam fecit in Christo Iesu Domino nostro
¹² in quo habemus fiduciam et accessum in confidentia per fidem eius
¹³ propter quod peto ne deficiatis in tribulationibus meis pro vobis quae est gloria vestra
¹⁴ huius rei gratia flecto genua mea ad Patrem Domini nostri Iesu Christi
¹⁵ ex quo omnis paternitas in caelis et in terra nominatur
¹⁶ ut det vobis secundum divitias gloriae suae virtute corroborari per Spiritum eius in interiore homine
¹⁷ habitare Christum per fidem in cordibus vestris in caritate radicati et fundati
¹⁸ ut possitis comprehendere cum omnibus sanctis quae sit latitudo et longitudo et sublimitas et profundum
¹⁹ scire etiam supereminentem scientiae caritatem Christi ut impleamini in omnem plenitudinem Dei
²⁰ ei autem qui potens est omnia facere superabundanter quam petimus aut intellegimus secundum virtutem quae operatur in nobis
²¹ ipsi gloria in ecclesia et in Christo Iesu in omnes generationes saeculi saeculorum amen

CAPITULUM 4

Obsecro itaque vos ego vinctus in Domino ut digne ambuletis vocatione qua vocati estis
² cum omni humilitate et mansuetudine cum patientia subportantes invicem in caritate
³ solliciti servare unitatem spiritus in vinculo pacis
⁴ unum corpus et unus spiritus sicut vocati estis in una spe vocationis vestrae
⁵ unus Dominus una fides unum baptisma
⁶ unus Deus et Pater omnium qui super omnes et per omnia et in omnibus nobis
⁷ unicuique autem nostrum data est gratia secundum mensuram donationis Christi
⁸ propter quod dicit ascendens in altum captivam duxit captivitatem dedit dona hominibus

⁹ quod autem ascendit quid est nisi quia et descendit primum in inferiores partes terrae
¹⁰ qui descendit ipse est et qui ascendit super omnes caelos ut impleret omnia
¹¹ et ipse dedit quosdam quidem apostolos quosdam autem prophetas alios vero evangelistas alios autem pastores et doctores
¹² ad consummationem sanctorum in opus ministerii in aedificationem corporis Christi
¹³ donec occurramus omnes in unitatem fidei et agnitionis Filii Dei in virum perfectum in mensuram aetatis plenitudinis Christi
¹⁴ ut iam non simus parvuli fluctuantes et circumferamur omni vento doctrinae in nequitia hominum in astutia ad circumventionem erroris
¹⁵ veritatem autem facientes in caritate crescamus in illo per omnia qui est caput Christus
¹⁶ ex quo totum corpus compactum et conexum per omnem iuncturam subministrationis secundum operationem in mensuram uniuscuiusque membri augmentum corporis facit in aedificationem sui in caritate
¹⁷ hoc igitur dico et testificor in Domino ut iam non ambuletis sicut gentes ambulant in vanitate sensus sui
¹⁸ tenebris obscuratum habentes intellectum alienati a vita Dei per ignorantiam quae est in illis propter caecitatem cordis ipsorum
¹⁹ qui desperantes semet ipsos tradiderunt impudicitiae in operationem immunditiae omnis in avaritia
²⁰ vos autem non ita didicistis Christum
²¹ si tamen illum audistis et in ipso edocti estis sicut est veritas in Iesu
²² deponere vos secundum pristinam conversationem veterem hominem qui corrumpitur secundum desideria erroris
²³ renovamini autem spiritu mentis vestrae
²⁴ et induite novum hominem qui secundum Deum creatus est in iustitia et sanctitate veritatis
²⁵ propter quod deponentes mendacium loquimini veritatem unusquisque cum proximo suo quoniam sumus invicem membra
²⁶ irascimini et nolite peccare soli non occidat super iracundiam vestram
²⁷ nolite locum dare diabolo
²⁸ qui furabatur iam non furetur magis autem laboret operando manibus quod bonum est ut habeat unde tribuat necessitatem patienti
²⁹ omnis sermo malus ex ore vestro non procedat sed si quis bonus ad aedificationem oportunitatis ut det gratiam audientibus
³⁰ et nolite contristare Spiritum Sanctum Dei in quo signati estis in die redemptionis
³¹ omnis amaritudo et ira et indignatio et clamor et blasphemia tollatur a vobis cum omni malitia
³² estote autem invicem benigni misericordes donantes invicem sicut et Deus in Christo donavit nobis

CAPITULUM 5

Estote ergo imitatores Dei sicut filii carissimi

² et ambulate in dilectione sicut et Christus dilexit nos et tradidit se ipsum pro nobis oblationem et hostiam Deo in odorem suavitatis

³ fornicatio autem et omnis inmunditia aut avaritia nec nominetur in vobis sicut decet sanctos

⁴ aut turpitudine aut stultiloquium aut scurrilitas quae ad rem non pertinent sed magis gratiarum actio

⁵ hoc enim scitote intellegentes quod omnis fornicator aut inmundus aut avarus quod est idolorum servitus non habet hereditatem in regno Christi et Dei

⁶ nemo vos seducat inanibus verbis propter haec enim venit ira Dei in filios diffidentiae

⁷ nolite ergo effici participes eorum

⁸ eratis enim aliquando tenebrae nunc autem lux in Domino ut filii lucis ambulate

⁹ fructus enim lucis est in omni bonitate et iustitia et veritate

¹⁰ probantes quid sit beneplacitum Deo

¹¹ et nolite communicare operibus infructuosis tenebrarum magis autem et redarguite

¹² quae enim in occulto fiunt ab ipsis turpe est et dicere

¹³ omnia autem quae arguuntur a lumine manifestantur omne enim quod manifestatur lumen est

¹⁴ propter quod dicit surge qui dormis et exsurge a mortuis et inluminabit tibi Christus

¹⁵ videte itaque fratres quomodo caute ambuletis non quasi insipientes sed ut sapientes

¹⁶ redimentes tempus quoniam dies mali sunt

¹⁷ propterea nolite fieri imprudentes sed intellegentes quae sit voluntas Domini

¹⁸ et nolite inebriari vino in quo est luxuria sed implemini Spiritu

¹⁹ loquentes vobismet ipsis in psalmis et hymnis et canticis spiritalibus cantantes et psallentes in cordibus vestris Domino

²⁰ gratias agentes semper pro omnibus in nomine Domini nostri Iesu Christi Deo et Patri

²¹ subiecti invicem in timore Christi

²² mulieres viris suis subditae sint sicut Domino

²³ quoniam vir caput est mulieris sicut Christus caput est ecclesiae ipse salvator corporis

²⁴ sed ut ecclesia subiecta est Christo ita et mulieres viris suis in omnibus

²⁵ viri diligite uxores sicut et Christus dilexit ecclesiam et se ipsum tradidit pro ea

²⁶ ut illam sanctificaret mundans lavacro aquae in verbo

²⁷ ut exhiberet ipse sibi gloriosam ecclesiam non habentem maculam aut rugam aut aliquid eiusmodi sed ut sit sancta et immaculata

²⁸ ita et viri debent diligere uxores suas ut corpora sua qui suam uxorem diligit se ipsum diligit

²⁹ nemo enim umquam carnem suam odio habuit sed nutrit et fovet eam sicut et Christus ecclesiam

³⁰ quia membra sumus corporis eius de carne eius et de ossibus eius

³¹ propter hoc relinquet homo patrem et matrem suam et adhaerebit uxori suae et erunt duo in carne una

³² sacramentum hoc magnum est ego autem dico in Christo et in ecclesia

³³ verumtamen et vos singuli unusquisque suam uxorem sicut se ipsum diligat uxor autem ut timeat virum

CAPITULUM 6

- f**ilii oboedite parentibus vestris in Domino hoc enim est iustum
- ² honora patrem tuum et matrem quod est mandatum primum in promissione
- ³ ut bene sit tibi et sis longevus super terram
- ⁴ et patres nolite ad iracundiam provocare filios vestros sed educate illos in disciplina et correptione Domini
- ⁵ servi oboedite dominis carnalibus cum timore et tremore in simplicitate cordis vestri sicut Christo
- ⁶ non ad oculum servientes quasi hominibus placentes sed ut servi Christi facientes voluntatem Dei ex animo
- ⁷ cum bona voluntate servientes sicut Domino et non hominibus
- ⁸ scientes quoniam unusquisque quodcumque fecerit bonum hoc percipiet a Domino sive servus sive liber
- ⁹ et domini eadem facite illis remittentes minas scientes quia et illorum et vester Dominus est in caelis et personarum acceptio non est apud eum
- ¹⁰ de cetero fratres confortamini in Domino et in potentia virtutis eius
- ¹¹ induite vos arma Dei ut possitis stare adversus insidias diaboli
- ¹² quia non est nobis conluctatio adversus carnem et sanguinem sed adversus principes et potestates adversus mundi rectores tenebrarum harum contra spiritalia nequitiæ in caelestibus
- ¹³ propterea accipite armaturam Dei ut possitis resistere in die malo et omnibus perfectis stare
- ¹⁴ state ergo succincti lumbos vestros in veritate et induti lorica iustitiæ
- ¹⁵ et calciati pedes in præparatione evangelii pacis
- ¹⁶ in omnibus sumentes scutum fidei in quo possitis omnia tela nequissimi ignea extinguere
- ¹⁷ et galeam salutis adsumite et gladium Spiritus quod est verbum Dei
- ¹⁸ per omnem orationem et obsecrationem orantes omni tempore in Spiritu et in ipso vigilantes in omni instantia et obsecratione pro omnibus sanctis
- ¹⁹ et pro me ut detur mihi sermo in apertione oris mei cum fiducia notum facere mysterium evangelii
- ²⁰ pro quo legatione fungor in catena ita ut in ipso audeam prout oportet me loqui
- ²¹ ut autem et vos sciatis quæ circa me sunt quid agam omnia nota vobis faciet Tychicus carissimus frater et fidelis minister in Domino
- ²² quem misi ad vos in hoc ipsum ut cognoscatis quæ circa nos sunt et consoletur corda vestra
- ²³ pax fratribus et caritas cum fide a Deo Patre et Domino Iesu Christo
- ²⁴ gratia cum omnibus qui diligunt Dominum nostrum Iesum Christum in incorruptione

For other languages please go to www.wordproject.org